

գականներին և նրանց ներկայութեամբ կորկոտը ածում երեխայի գլխին՝ նստեցնելով նրան իրենց մեջ հատակին և գլուխը սփոռցով ծածկելով: Երեխայի առջև դնում էին սանր կամ հայելի և դանակ: Եթե նա ձեռքը պարզեց դեպի սանրը կամ հայելին, դա գուշակում էր, որ հաջորդ ծնվողը քույր է լինելու, իսկ եթե դեպի դանակը՝ եղբայր⁸⁰: Այս կորկոտը Արծվանիկում կոչվում էր կեկեխաշ⁸¹, ինչպես և Վարանդայում, իսկ ուրիշ գյուղերում՝ կեղահատիկ⁸²: Երեխան ազահուժեամբ հատիկներն ու քաղցրեղենը բերանն էր լցնում: Ներկա եղողները նրան օգնում էին, որ ապագայում երեխայի ատամները նույն արագութեամբ գործեն և միշտ առատ հաց և քաղցրեղեն վայելեն: Այս սովորութիւնը տարածված էր ոչ միայն հարևան Վարանդայում և Գանձակի շրջանում, այլև գրեթե բոլոր հայաբնակ գավառներում: Վանում դա պարզապես կոչվում էր խատիկ՝ հատիկ:

Երեխային քայլել վարժեցնելու համար կանգնեցնում էին նրան երեք-անիվանի հենարանի՝ ճրրոռանի⁸³ մոտ: Նա ճրրոռանը բրթելով առաջ էր գնում, հենվելով նրան:

Գժվար և ուշ ոտքի ելնող երեխային տանում էին Միծեռնավանք, Ագուստին քարի առաջ ոտներին ջուր էին ածում, կամ Բեխ գյուղի մոտ եղած Աստվածածնի եկեղեցին և դուռն գլխի ծակով երեք անգամ անցկացնում, միշտ միևնույն կողմից: Ոտքի ծանրութիւնը լվացվում էր կամ վրայից սրբվում՝ ֆերվում, քանի որ ոտք ելնելու ուշանալը բացատրում էին իբր թե ուրեմն մոր կաթը ծանր է եղել և այդ ծանրութիւնը անցել է երեխային:

Ման գալ սկսող երեխային կամ երկու ձեռքերից ման էին ածում կամ երեխայի ձեռքը տալիս էին փայտի մի ծայրը, իսկ մյուս ծայրը իրենք էին բռնում զգուշութեամբ և քաշելով, երեխային քայլել դրդում:

Մայրն աշխատում էր երեխային երկար կերակրել իր ծծով, երբեմն մինչև իրեք տարի, ի միջի այլոց այն համոզմունքով, որ դա նպաստում է ուշ հղիանալուն:

Մ Ա Հ Ե Վ Թ Ա Ղ Ո Ի Մ

Ամեն մի ծնունդ ավելացնում է ընտանիքի կազմը, ամեն մի մահ պակասեցնում է այդ կազմը: Թե՛ ծնունդը և թե՛ մահը շոշափում են ոչ միայն ընտանիքի, այլև ամբողջ տոհմի և համայնքի շահերը: Տոհմն ու համայնքը արձագանքում էին ընտանիքի անդամների թվի թե՛ աճելուն և թե՛ կրճատվելուն: Թաղման հանդեսների մեջ էլ որպես հարսանեկան և տղաբերքի սովորութիւնների մեջ մինչև վերջերս պահպանվում էին վաղուց ապրած հասարակարգի շատ բնորոշ մնացորդները: Հին զանգեզուրցու հասկացողութեամբ՝ մարդու ճակատին գրված է նրա մահվան օրը: Ոչ մի հանգամանք, ոչ մի միջոց չի կարող փոխել ճակատագրով նշանակված ժամը: Այս համոզմունքով զանգեզուրցին հանգիստ դիմավորում էր մահվանը, մյուս կողմից շրջապատողներն

⁸⁰ СМОМПК, ВЫП. XXV, ОТД. II, էջ 44: Գորիսում աղջկա գլխին սանր էին դնում, տղայի գլխին՝ դանակ կամ շախմախ:

⁸¹ Կեկե՝ եփած ցորեն, կեղեփ:

⁸² Շատ տեղերում կոչվում էր ակոսահատիկ՝ ատամի հատիկ:

⁸³ Ճրրոռան են կոչվում նաև այն փայտե ձեռքի խաղալիքները, որոնցով երեխաները Մեծ պատի վերջին շաբաթվա հինգշաբթվա Սգի գիշերը եկեղեցում ճրոռոց են բարձրացնում: